



GLION

S'annunziar pil «Ilanzer Sommer»

Dapi l'entschatta zercladur ein ils detagls enconuschents digl'emprem «Ilanzer Sommer» 2021. Sco quei ch'il comite d'organisaziun communichescha, ei il simposi dils 12 tochen ils 14 d'uost ellas localitads dalla Casa Sentupada dalla claustra da Glion. Igl ei in'occurrnza naziunala che sededichescha alla cultura da pasch. Participontas e participonts s'approfundan duront quels treis gis ella cultura dalla pasch en treis secturs, numnadamein en vischnauncas, scolas e tier las medias. Tier tuts treis secturs dat ei ateliers cun persunas cumpetentas e da renum che refereschan e meinan discuors. Nua che carstgauns vivan e lavuran ensemen dat ei conflicts. Quei sa ei dar en vischnauncas e radunonzas, denter vischins, en in quartier, nua che glieud da differentas culturas duess tgirar ina buna convivenza. Buca adina sempel. Il sector «vischnauncas» dat impuls da tgirar la cultura dalla pasch. La part dalla scola pren sut la marella las scolas. Participontas e participonts san brattar experientschas e discutir da metodas co ins savess evitar polarisaziuns ed in clima freid. Il tierz sector dalla «stad da Glion» sededichescha alla cultura da discussiun tier emissiums da televisiun e tier las medias. Gest en ina emissiun sco la «Arena» digl'emittur SRF escaleschan adina puppei conflicts denter las diversas partidas. In forum da pasch vul buca gidar d'evitar conflicts, denton da tgirar quels el senn d'in dialog constructiv. La «stad da Glion» entscheiva gia ils 8 d'uost cun in'occurrnza introductiva. Duront gl'entir simposi dat ei in vast program accumpignont. Dapli informaziuns dat la pagina d'internet www.ilanzersommer.ch (fmr/abc)



La pacifista Lea Suter presidiescha l'organisaziun-purtadra digl «Ilanzer Sommer».

FOTO AUGUSTIN BEELI